

Kisa CRIF ye?

Children's Rights Innovation Fund (Fon Inovasyon pou Dwa Timoun ("CRIF")) se yon òganizasyon ki bay sibvansyon, e yon kominate aprantisaj pou donatè. CRIF egziste pou li chanje fason nou finanse ak jan nou aplike dwa timoun atravè lemonn. Sa vle di ke nou ofri opòtinite (tankou sa a) pou nou aprann de timoun ak jèn aktivis yo, e pou nou pataje sa nou aprann sou kisa ki ka fèt nan yon fason diferan (e miyò!), avèk moun ki gen pouwva pou yo fè pi bon chwa yo. Nou vle pou timoun ak jèn aktivis yo gen zouti ak sipò yo bezwen pou chanje lemonn kounye a.

Nou aprann ti kras pa ti kras, ki vle di ke nou pa toujou genyen bon repons lan, oswa gen tout bagay byen kalkile. Men, n ap koute. Epi nan tout sa n ap fè, nou travay dirèkteman ansanm ak timoun yo, aktivis jèn yo, epi alye yo pou pèmèt yo pran bon jan desizyon ki pral afekte pwòp tèt yo ak moun ki bò kote yo.

Kisa pwogram "dekolonize!" a ye?

CRIF te fonde an 2020, nan kòmansman pandemi COVID-19 la, epi pandan manifestasyon Black Lives Matter a te dewoule atravè lemonn. Paske CRIF se yon nouvo fon ki vle fè bagay yo yon lòt jan, nou te byen reflechi sou sa nou ta dwe finanse an premye. Nou te vle kreye yon bagay ki pèmèt timoun ak jèn yo konekte epi pataje istwa yo; men tou, nou te vle pote atansyon sou enjistik yo ki se sous pwoblèm ki afekte timoun yo.. Nou deside kòmanse avèk rasis ak kolonyalis epi kijan yo te toujou vyole dwa timoun ak jèn yo atravè lemonn; epi kijan bagay sa yo kontinye afekte moun an jeneral chak jou.

Epi, fòk nou te deside ki kote pou nou kòmanse travay nou an. Antanke yon nouvo fon, nou pa t kapab kòmanse ak lemonn antye. Nou te deside kòmanse travay nou ak yon pati nan listwa ki chanje anpil nan kominate ak peyi nou yo pandan plizyè santèn ane: komès esklav TransAtlantik la. Kidonk, nou kòmanse travay nou an Afrik Lwès, ak Amerik yo (Amerik di Sid, Santral, Amerik di Nò ak Karayib la), pou nou suiv chemen komès esklav TransAtlantik la ak dega li te koze nan tan lontan, e ke li kontinye lakòz jodi a.

Apre sa, nou te panse ki moun nou te kapab finanse. Tandiske rasis ak kolonyalis afekte tout moun, nou konnen timoun ak jèn - sitou sa yo ki idantifye kòm moun Nwa, Afriken ak desandan Afriken yo - pi souvan fè fas ak enpak kwayans ak politik rasis ak kolonyal yo. Nou panse ke timoun Nwa yo ak jèn yo gen anpil bagay pou anseye nou sou fason pou detwi bagay sa yo.



CR if... dekolonize!

Ou mansyone manm 'Kolaborasyon yo, kisa sa ye, e poukisa yo enpòtan?

Pou CRIF, fè bagay yon lòt jan vle di bay timoun ak jèn aktivis yo bon jan pouvwa tout bon, pou yo pran desizyon. Nan mwa novanm 2021 an, CRIF te òganize premye gwoup kolaborasyon sibvansyon patisipatif li. Ekip sa a, ki gen uit (8) timoun Nwa ak jèn aktivis Nwa, ki soti nan Afrik Lwès ak Amerik yo, trè divès. Ansanm, yo pale plis pase 4 lang, epi yo soti nan 8 peyi: Benen, Syera Leòn, Ganbi, Perou, Brezil, Kolonbi, Barbad ak Etazini.

Manm Kolaborasyon yo pa t janm rankontre anvan yo te chwazi yo, men nou te reyini yo ansanm (nan yon espas vityèl) sou yon total de 4 jou, ak yon ekip entèprtèt lang enkwayab ansanm avèk ekip CRIF nou yo. Yo te pataje istwa yo ak eksperyans yo, epi ofri pèspektiv yo sou sa ki enpòtan pou yo, kounye a ak nan lavni. Panse ak lide sa yo te vin tounen sa nou rele estrateji sibvansyon "dekolonize!" a. Menm gwoup sa a pral evantyèlman deside ki aplikan ki pral resevwa sibvansyon yo. CRIF rekonesan anpil anvè chak manm Kolaborasyon an pou ensistans kontribisyon yo nan pwosesis sa a.



Ki kalite travay CRIF pral sipòte?

Nou konnen ke rasis ak kolonyalis ka parèt trè diferan sòti de yon kote, rive nan yon lòt kote. Se poutèt sa, nou vle aprann nan men w kisa rasis sanble nan lavi ou ak nan kominate w. Epi, nou vle konnen kisa ou ta ka fè pou ede chanje defi rasis ak kolonyalis kreye yo.

Nou espere finanse nenpòt travay ki adrese rasis ak kolonyalis epi ki dirije pa timoun ak jèn moun Nwa yo. Sa ka vle di travay ki abòde lòt pwoblèm tou, tankou jistik klimatik, jistik sèks, dwa tè, sante repwidiktif e seksyèl, entimidasyon rasyal, nenpòt kalite diskriminasyon, oswa atizay ak kilti. Nou enterese tou pou finanse yon pakèt pwojè ki ka gen ladan I pwojè òganize nan lekòl, lekòl, kanpay sansibilizasyon piblik, espas aprantisaj ant kanmarad oswa nenpòt lòt pwojè w ap travay sou li.

Si ou pa sèten epi ou satisfè kritè ki anwo yo, tanpri enskri nan youn nan sesyon enfòmasyon nou yo. Oswa jis aplike. Nou ta renmen konnen plis sou ou, ak travay ou.

CR if... dekolonize!

Ok, kilès ki ka aplike?

Nou reyèlman vle sipòte lide ak rèv timoun ak jèn aktivis Nwa yo. Nan yon monn ideyal, si nou te gen finansman san limit, nou ta sipòte tout moun ki aplike. Malerezman, nou pa nan pozisyon pou nou fè sa, alò nou te byen reflechi sou kiyès pamí nou, ki pi ekspose a risk ak prejije - moun ki pi frajil yo -, ansanm ak moun ki anjeneral eskli nan opòtinite sa yo. Avèk lide sa a, nou envite w aplike, si ou:

1. Identifie tèt ou kòm yon aktivis Nwa, Afriken ak/oswa ki gen desandans Afriken.



2. Gen ant 13 ak 27 an. Nou ta renmen espesyalman envite jèn ak aktivis ki adolesan yo nan komunitate LGBTQ+ la, ak moun ki andikape pou yo aplike.



3. W ap aplike kòm manm yon gwooup: - gwooup sa a pa oblige anrejistre legalman, men li dwe dirije ak fasilité pa jèn moun.

- Sibvansyon debaz: Yon sibvansyon debaz se yon sibvansyon ki konplètman fleksib, ki gen objektif pou li sipòte operasyon òganizasyon w lan. Sibvansyon sa yo sipòte egzistans yon gwooup pou pèmèt li kontinye fè travay li déjà ap fè. Si w ap aplike pou yon sibvansyon debaz, gwooup la dwe travay ansanm pou omwen 6 mwa, epi li dwe kapab bay prèv jan yo mande sa.



- Sibvansyon ki baze sou pwojè: Yon sibvansyon ki baze sou pwojè se yon sibvansyon ki pou sipòte yon pwojè espesifik. Sibvansyon sa yo pa sipòte operasyon debaz yon òganizasyon, men olye de sa, yo sipòte oswa pèmèt ekzekisyon yon pwojè. Aplikan pou sibvansyon ki baze sou pwojè pa nesesèman te oblige travay ansanm anvan, men aplikasyon an dwe soumèt pa yon gwooup ki gen omwen 3 moun ki gen entansyon dirije pwojè a ansanm.

4. Rete nan zòn riral yo, oswa nan zòn iben ki defavorize nan Amerik yo (Amerik di Sid, Santral, Amerik di Nò ak Karayib la) oswa Afrik Lwès (Benen, Burkina Faso, Cape Vert, Kot Divwa, Ganbi, Gana, Gine, Gine-Biso, Liberya, Mali, Moritani, Nijè, Nijerya, Senegal, Syera Leòn, Togo). Paske nou vle asire nou ke nou enkli sa ki gen plis risk pamí nou yo, oswa ki gen mwens chans pou gen opòtinite sibvansyon yo, nou espesyalman envite moun ki sòti nan komunitate migran, ak / oswa sa ki sibi deplasman yo, pou yo aplike.



5. Nan nenpòt ki fason, se pou gen yon afiliyasyon ak yon òganizasyon komunitè, oswa mouvman sosyal, oswa gwooup òganizè ki sipòte timoun ak jèn moun Nwa, Afriken ak Afro-desandan yo. Sa ka vle di ke ou se yon anplwaye nan òganizasyon an, oswa ou sèvi kòm yon volontè, oswa ou te rantre nan òganizasyon an pou sipòte travay li pandan omwen sis (6) mwa an total. Òganizasyon an ta dwe kapab konfime relasyon ou avèk yo, si demann lan fèt.

CR if... dekolonize!

Konbyen kòb finansman mwen ka resevwa?

CRIF ap aksepte pwopozisyon timoun Nwa ak jèn aktivis pou sibvansyon ki sòti nan 500 dola ameriken rive 10 000 dola ameriken. Tanpri, fè nou konnen kantite lajan w ap bezwen lè w ranpli aplikasyon w lan. Malgre ke nou ka pa kapab finanse tout pwojè ou a, nou ta renmen konnen, otank posib, sou depans ou prevwa yo.

Ah, donk si mwen kalifye, èske òganizasyon mwen an ka jwenn yon finansman debaz?

Depi òganizasyon w lan gen omwen 6 mwa, nou envite w aplike pou finansman debaz la, oswa finansman ki base sou pwojè espesifik la. Gwoup la pa bezwen anrejistre ofisyèlman, men ou dwe kapab montre nou, oswa eksplike nou travay ou te fè a ke ou ta renmen kontinye.

Èske ou bay finansman pou yon pwojè espesifik?

Definitivman! Finansman pou pwojè espesifik pou travay timoun ak jèn moun ap dirije e jere, disponib pou nenpòt gwoup ki gen 3 moun oswa plis, ki gen entansyon travay ansanm sou pwojè sa a, depi yo satisfè tout lòt kritè yo. Sa vle di menm si ou pa yon gwoup ki te travay ansanm anvan, men ou vle mete tèt ou ansanm ak kèk zanmi oswa manm kominote a, pou travay sou yon pwojè espesifik, nou ta renmen ou aplike. Nou vle espesyalman sipòtè òganizasyon kominotè ak pwojè òganize nan lekòl, sipò dirèk, devlopman atizay ak kiltirèl, rekreyasyon ak espò, ak dwa pou edikasyon . Nou ta renmen tandem, menm si ou pa sèten ke lide pwojè ou a aliyen egzakteman nan kategori sa yo.

Oke, mwen enterese. Kòman mwen ka aplike?

Nou vrèman kontan pou nou resevwa aplikasyon w lan! Tanpri ale sou lyen sa a pou aplike. Yo pral mande w pou reponn kèk kesyon ki pral di nou yon ti kras sou ki moun ou ye, ak travay gwoup ou a ap fè oswa ou ta renmen fè. Aplikasyon sa a pral pèmèt ou reponn kesyon sa yo swa soumèt yon vidoyo, yon anrejistreman odyo oswa ou ka ekri nou. Si w gen nenpòt kesyon, tanpri kontakte nou nan decolonize@crifund.org epi yon moun ap reponn ou osito ke posib.



CR if... dekolonize!

Ok, donk si mwen soumèt aplikasyon mwen an, kisa k ap pase apre?

Yon fwa aplikasyon yo fèmen le 9 me, ekip CRIF la pral fè kèk seleksyon pou asire ke ou elijib pou aplike, e ke ou satisfè kritè nou te pataje yo. Apre sa, manm kolaborasyon yo, avèk sipò konseye jèn yo, pral revize aplikasyon yo epi finalman deside ki aplikasyon yo pral finanse. Nou konnen ke malerezman nou p ap ka finanse tout pwojè enkwayab ou yo, men n ap fè w konnen kanmenm, si wi ou non yo te finanse w. Si w pa jwenn finansman, nou toujou ankouraje w pou w kenbe kontak avèk nou, pou nou ka fè w konnen lè lòt opòtinite vin disponib.

Pa gen pwoblèm. Èske ou ka raple m ankò dat enpòtan yo?

Sètènman. Aplikasyon yo louvri le 30 mas epi y ap fèmen le 9 me. Nou gen entansyon kontakte tout aplikan yo nan fen mwa jen an, pou nou fè yo konnen rezulta aplikasyon yo an, men n ap bay mizajou sou rezo sosyal yo si gen yon bagay ki chanje.

Si mwen bezwen plis enfòmasyon, ki kote pou mwen mande?

Pandan tout pwosesis aplikasyon an, CRIF pral òganize kèk sesyon enfòmasyon sou Zoom, epitou li pral ko-òganize kèk sesyon sou rezo sosyal ak manm Kolaborasyon nou yo! Se yon bèl okazyon pou rankontre kèk nan moun ki te travay ansanm pou kreye apèl pou pwopozisyon sa a, aprann plis sou nou, epi jwenn repons a kesyon ou yo. Dat pou sesyon sa yo pral anonse sou rezo sosyal yo, donk asire w ke ou suiv nou la. Nou sou Instagram ak Twitter @crifund1. Ou ka jwenn nou tou sou Facebook ak TikTok @CRIF. Si ou gen nenpòt kesyon ke ou ta renmen pou nou reponn imedyatman, tanpri pa ezite kontakte nou nan decolonize@crifund.org epi yon moun ap reponn ou osito ke posib.

